



Borgarráð Reykjavíkur
Tjarnargötu 11
101 Reykjavík

Hér með sendist útskrift úr gerðabók skipulags- og samgönguráðs frá 9. september 2020 varðandi eftirfarandi mál.

Tímabundnar göngugötur í miðborginni

Lögð fram tillaga frá umhverfis- og skipulagssviði, Skrifstofu samgöngustjóra og borgarhönnunar, dags. 2. september 2020, um að framlengja tímabundnar göngugötur frá 1. október 2020 til 1. maí 2021 eða þar til deiliskipulag 2. áfanga hefur tekið gildi.

Samþykkt.

Vísað til borgarráðs.

Tveir fulltrúar Sjálfstæðisflokksins, Hildur Björnsdóttir og Katrín Atladóttir sitja hjá, fulltrúi Sjálfstæðisflokksins Ólafur Kr. Guðmundsson greiðir atkvæði gegn tillögunni.

Fulltrúar Samfylkingarinnar, Viðreisnar og Pírata leggja fram svohljóðandi bókun: Undirrituð styðja við fjölgun göngugatna í miðborginni. Kannanir sýna að meirihluti íbúa er jákvæður gagnvart göngugötum og að jákvæðust séu þau sem heimsækja svæði göngugatna að minnsta kosti vikulega. Fulltrúar Pírata, Samfylkingar og Viðreisnar í ráðinu samþykkja því tillöguna um framlengingu tímabundinna göngugatna þar til 1. maí 2021 eða þegar nýtt deiliskipulag fyrir varanlegar göngugötur tekur gildi.

Áheyrnarfulltrúi Miðflokksins leggur fram svohljóðandi bókun:

Hér er lýst yfir algjörum forsendubresti. Borgarstjóri og meirihlutinn tekur einhliða ákvörðun um lokun Laugavegarins allt árið um kring einungis 21 degi fyrir fyrirhugaða opnun fyrir bílaumferð. Fyrirvarinn er enginn. 30 milljónum var eitt í sérstakt kynningarátak á þessu svæði í sumar og tilgangurinn var að "glæða miðbæinn lífi". Nú er ljóst að þeim peningum var fleygt þráðbeint út um gluggann en gæluverkefni þurfa sitt. Nú er verið að samþykkja bráðabirgðaverkferli um að hafa Laugavegin og þær götur í nágrenni hans sem skilgreindar hafa verið göngugötur lokaðar fyrir bílaumferð til 1. maí 2021 eða þar til nýtt deiliskipulag tekur gildi um varanlega lokun. Þessi ákvörðun kemur eins og þruma úr heiðskýru lofti. Með öðrum orðum, það er búið að skella Laugaveginum í lás til framtíðar án nokkurs samráðs við rekstraraðila sem þó eru að berjast í bökkum að halda uppi þjónustu svo að miðbærinn sé ekki steindauður. Þetta eru ískaldar kveðjur frá meirihlutanum í upphafi hausts, ekki bara til rekstraraðila heldur líka landsmanna allra. Borgarstjóri og meirihlutinn eiga ekki Laugavegin og nágrenni hans.



Reykjavíkurborg

Umhverfis- og skipulagssvið

Áheyrnarfulltrúi Flokks fólksins leggur fram svohljóðandi bókun:

Það er mat fulltrúa Flokks fólksins að það sé afar óskynsamlegt að framlengja tímabundna göngugötur í borginni. Bærinn er líflaus nú og með því að opna aftur göturnar sem um ræðir eins og ráð var fyrir gert glytti í smá von að fleiri myndu vilja heimsækja hann. Nú er aðeins um Íslendinga að ræða þar sem engir ferðamenn eru en Íslendingar koma ekki í bæinn. COVID og afleiðingar faraldursins hefur vissulega slegið rothöggið en vandinn var orðinn háalvarlegur áður en COVID skall á. Að framlengja tímabundnar göngugötur á því engan veginn við nú og þjónar ekki tilgangi. En fjölgar auðum rýmum og varla er að sjá hræðu á ferðinni. Hvert er markmið skipulagsyfirvalda með steindauðum göngugötum nú þegar vetur gengur í garð með vályndum veðrum? Þetta mun fara endanlega með marga, þá sem sáu fyrir sér þann draum að götur opnast í haust. Nú er sá draumur úti og þeir munu endanlega loka ef þetta gerist. Næstu mánuði munu margir blæða út.

F.h. umhverfis- og skipulagssviðs

Glóey Helgudóttir Finnsdóttir

Glóey Helgudóttir Finnsdóttir

Fylgiskjal: tillaga umhverfis- og skipulagssviðs, Skrifstofu samgöngustjóra og borgarhönnunar, dags. 2. september 2020.



Framlenging á sumargötum á Laugavegi milli Frakkastígs og Klapparstígs ásamt Vatnsstíg milli Laugavegs og Hverfisgötu.

Lagt er til að Skipulags og samgönguráð samþykki að eftirfarandi götur verði tímabundnar göngugötur frá 1. október 2020 – 1. maí 2021:

- Laugavegur milli Klapparstígs og Frakkastígs
- Vatnsstígur milli Laugavegs og Hverfisgötu

Almenn umferð og bifreiðastöður verði óheimilar. Akstur vegna vöruafgreiðslu verði heimilaður milli klukkan 7 og 11 virka daga og milli klukkan 8 og 11 á laugardögum. Aðgengi íbúa/starfssemi með bílastæði inni á lóð við göturnar verði tryggt. Tímabundnar göngugötur verði merktar með viðeigandi merkjum í samræmi við reglugerð um umferðarmerki og notkun þeirra.



Mynd 1 Göturnar sem lagt er til að verði göngugötur eru merktar með gulu.

Greinagerð:

Göngugötur á svæðinu í sumar hafa gengið vel og mikið líf hefur skapast á svæðinu. Í undirbúningi er deiliskipulag á varanlegri göngugötu á svæðinu í samræmi við samþykkt skipulags- og samgönguráðs þann 27.maí 2020. Þessi hluti götunnar telst til annars áfanga göngugötunnar Laugavegs en sú áfangaskipting var kynnt í Skipulags og samgönguráði þann 3ja apríl 2019 og er í samræmi við tillögu um göngugötur sem samþykkt var í borgarstjórn 4.september 2018.

Tillagan hefur verið borin undir og hlotið samþykki lögreglunnar á höfuðborgarsvæðinu.



Reykjavíkurborg
Umhverfis- og skipulagssvið

Fyrir hönd skrifstofu Samgöngustjóra og borgarhönnunar

Edda Ívarsdóttir

Edda Ívarsdóttir

Borgarhönnuður

